



STINAPA TA INFORMA

E REINA SIRENA DI LAMAN BONERIANO

E señora aki ta kasi sinónimo ku e laman boneriano. Ludwina Daniella Gustowski-Bernabela. Su nòmber ta na honor di L.D. Gerharts, ku a stim'é mashá manera su propio yu. Además di ta mama i wela, e ta traha komo guia pa turista i pelukera. E ta gusta tur spòrt di laman pero waterski tabata su hòbi favorito. Komo mucha nan tabata yam'é 'Piskechi!' "Pasobra di dje nos ta biba!" ta su kontesta firme ora puntr'é dikon naturalesa ta importante pa nos ekonomia. "E turista ta bini pa e naturalesa." Daniella ta laman, i laman ta Daniella. "E ta mi kuki" manera e mes ta bisa. Segun Daniella hopi biaha bo ta tende laman papia ku bo si bo skucha bon. Su amor eksepsional pa e laman boneriano ta eksistí for di infansia. Ora su mayornan i rumannan a muda bai Kòrsou el a keda serka su wela i famia Gerharts. Daniella sa kon nos por biba di naturalesa. For di chikitu e mes tabata gana su 'zakgeld' dor di bende sobrá di as. Su kliente di mas grandi tabata Heitkönig ku tabata uza e as pa kria su bestianan. Tambe Daniella tabata kue piská pa Captain Don su seaquarium. "E preis tabata dependé di e tamaño i sorto di piská, un Pewchi òf Kataboli tabata fásil pa haña pero un Polis di Laman tabata difísil." Daniela ta kontá. El a siña su mes landa for di chikitu. I a trein su pulmonnan dor di pusta ku otro muchanan ken por bai mas hundu bou di awa. Antes barkunan tabata trese komestibel riba palèt. Tin biaha e kabuya ta kibra anto e palèt ta bai awa. Manera Daniella tende "palèt di djèm òf lechi kondèn a bai awa!", e tabata rema den su boto ku un amiga bai waf. E tabata sambuyá ku un bleki mará na un kabuya, hinka e komestibelnan den e bleki i e amiga tabata hala e kabuya. Loke e kue, e tabata kana parti den su barío. Pampuna no sa pari kalbas. Su nietu di 11 aña a kaba di siña sambuyá. El a spanta ora el a wak tantu restu di klapchi den fondo di laman. Mesora el a yama su amiganan i nan a hasi un limpiesa. P'esei mes Daniella su mensahe ta pa kuida nos laman i ten'é limpi. Tantu pa nos komo pa nos generashonnan nobo.

Skirbí pa Natalie Wanga.

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURALESA



Traha huntú na un desaroyo duradero pa Boneiru